



*Jumat, 08 September 2023*  
**Ogen : 2 Kronika 34:29-34**



**Ngoge Nambahi Pemeteh**



**R**usur si begi kuan-kuan maka buku adalah jendela dunia, e me jendela ku arah pemeteh, kepentaren. Pandangan enda seh asa gundari lenga terbantahken. Payo tuhu maka arah ngoge buku si bermutu, kita pe reh pentarna, akal sehatta pe berkembang ras perilakunta pe semakin beradab. Kita jadi manusia si lebih baik. Maka adi kita ngoge buku si bermutu la lit rugina. Ngoge buku si bermutu tentu beda ras ngoge konten i media sosial ntah pe meggi berita-berita i TV. Fokus, wawasan, kedalaman ras pemeteh si ibereken ndauh ulin tupung kita ngoge buku bermutu.

Bage nge si terjadi i bas reformasi sinilakoken raja Josia. Kitap perpadanen sini dat i bas Rumah Pertoton jadi sada sumber primer guna ndalanken pembaharuan ras perubahan kegeluhen bangsa Juda terkhusus i bas erkiniteken. Kitap perpadanen e isina e me perintah ras tuntutan Tuhan nandangi umatNa. I bas iogeken kitap enda maka kerina kalak Juda meteh kerna kedalaman, pemeteh kerna si ngena ate Tuhan janah kalak enda pe turah i bas kualitas kiniteken.

Kedungenna kita arus sedar maka kitap-kitap si isina sura-sura Tuhan si mehuli nandangi umatNa e me dalam menuju Tuhan. Sabap isina e me mpedeher kita ras keleng ate ras kepentarenNa. Adi kerina kalak ngoge kitapna alu payo maka si tuhuna labo lit kebodohen ras konflik atas nama agama. Doni enda pe jadi mehuli. E maka mari sitingkatkan budaya ngoge i bas dirinta ras jabunta, cukup 15-30 menit teptep warina. I nggo si dat sada pemeteh i bas si e, khususna sumber primer kiniteken kalak Kristen e me Pustaka Si Badia.